


KOTIAMA YA BASUNGI

 Mpe, ezali ete, eloko ya liboso ezali kotiamana ya basungi na kati ya losambo. Mpe losambo moke na biso oyo ezali na bonsómi. Ezali na dénominasion moko te to eloko moko te mpo na kotínda basungi na yango awa, eponaka basungi na yango moko. Eponaka mokengeli na yango, eponaka bayángelimi-solo na yango, eponaka nyonso oyo ekótaka na mosála mpe elongwaka na mosála ya losambo. Moto moko te nde azalaka na likambo ya koloba, losambo mobimba nde. Mpe losambo ezali baoyo bayáka awa mpe basungaka losambo na bozali na bango, na moko na zomi mpe makabo na bango, bango nde bazalaka ntango nyonso na likambo ya koloba ntango ya kotiáká makambo ya bongo.

² Nalingi kopesa matondi na likita ya basungi oyo eleki, mpe nazali koloba yango awa mpo na losambo mobimba. Soki bandeko yango mosusu bazali awa, ezalaki Ndeko Cox, Ndeko Fleeman, ná Ndeko Higginbotham mpe Ndeko Deitzman, basálelaki biso mosala malamú, basáleli nde Nkolo, na losambo oyo.

³ Mpe mbala na mbala, kokokana na maséngí ya lingomba, mobu na mobu, basungi to bayángeli-misolo bakómaka na nsuka ya eleko ya mosala na bango mbala moko. Soki balingi kozóngela kosala, ezali mabe te. Soki baboyi na bango kozóngela kosala, na bongo, bakoki kotia bato mosusu na bisika na bango, mpo likita yango etiki mosala.

⁴ Mokolo mosusu wana na mpokwa, nabengisaki likita ya bayángeli-misolo, ezali sikawa na likita ya sika ya bayangelimi-solo. Namonaki Ndeko Luther McDowell awa na mpokwa oyo, tozali na esengo ya komona ye awa, azaláká na kati ya likita ya bayangelimi-solo. Nakendeki, na mpóso oyo, kotúnatuna mpo na koyeba soki bakoki kosálista fotocopie mosusu, oyo ekotálisama mpe na losambo. Boye, bayangelimi-solo ya losambo sikawa ezali Ndeko William Morgan, Ndeko Mike Egan, ná Ndeko Banks Wood, mpe Ndeko Roy Roberson. Mpe bango nyonso bafándaka na engumba oyo, longola kaka Ndeko Roberson oyo afándaka katikati na bingumba mibale oyo. Nkolo asili komona ete bato yango babongi na mosala yango, mpe bazali bato na lokumu, mpe sikawa basili kozua mokúmba ya mosala ya bayángeli-misolo ya losambo oyo.

⁵ Bongo, wana likita yango ezalaki kosalema, mpe eyebisamaki na mokengeli-mosungi ete, tosengeli kopona likita ya sika ya basungi, ete baoyo basilaki kokóma na nsuka ya eleko na bango mpe—mpe batikaki mosala, na bongo esengelaki kopona basungi mosusu. Sikawa, losambo . . . Lolenge likambo

yango esálamaka, ezali ete, likita ekoki kotánga nkombo ya basungi, mibali oyo bazalaka elongo ná bango mpe baoyo bamónaka ete bazali bato ya lokumu mpe ya sembo.

⁶ Mosala ya mosungi ezali mpenza mosala moko monene, mpe ya lokumu monene epai na Nkolo, kozala mosungi na lingomba. Na bongo, na likita yango na mpokwa mosusu wana, bapesaki ngai bankombo ya bato moko boye. Mpe ntango tokútanaki elongo ná mokengeli, mokolo ya mitano oyo elandaki . . . oyo euti koleka, ye andimaki ete mibali yango bazalaki bato na lokumu mpe bato ya sembo.

⁷ Elenge mobali moko oyo bango bamonaki, akokisaki mpenza te oyo eséngamaka (ezali te mpo azalaki moto mabe), moko oyo bapésaki nkombo na ye na moto ya lokumu moko ya likita na biso ya bayangeli-misolo. Kasi ntango mokengeli ná ngai tokútanaki, natúnaki mibu ya elenge mobali yango, asili koleka mibu ntuku mibale mwa moke. Azali moto na lokumu, moto ya sembo, mpe mobali ya solosolo, kasi tomonaki ete azalaki monzamba. Biblia esengi ete mosungi ázala moto oyo abálá. Asengeli kozala mobali ya mwasi moko.

⁸ Na nsima mobali mosusu, azalaki mpe moto moko ya lokumu mpenza, abongaki mpenza na mosala yango mpe alingaki kozala moto oyo amipesi, ndeko moko nde apesaki nkombo na ye. Bongo, nsima na koyekola likambo yango, ndeko yango autaki kondima Nsango oyo, mwasi na ye andimaka Yango te. Na bongo wana esalaki ete mobali yango alóngobana te na mosala yango. Mpamba te, asengeli kozala na libota na ye mobimba kati na botósi, bango mpe basengeli kozala kati na Kondima, mpamba te ekozala matata.

⁹ Mpe tozali kotonga sikawa, tozali na mposa ya kotia losambo oyo na esika na yango. Mpe lokola mobateli mokonzi ya losambo oyo, nasengeli kondimisama ete ezali kobátelama, kokokana na Makomi, ete makambo nyonso elóngobani mpenza na Liloba.

¹⁰ Boye na yango, na bongo, emonanaki malamú mpo na likita ná mokengeli, ná mobateli, kopona, kati na bato oyo bazalaka awa, mibali oyo tomoni ete bazali bato na lokumu mpe ya sembo. Biso tokoki bobele koya na bango awa. Mpe ezali, na nsima, losambo nde ekopona bango, na maponami na bango moko. Na nsima bato yango bakosala mosala, soki bamoni ete bakondima mosala yango. Na nsima bakoya kolekisa mwa ntango moke, mpo báyebe soki bakomona ete ntango mosusu Nzambe nde abéngi bango. Mpe soki nsima na yango, bamoni ete balóngobani na yango te, na bongo, bazali na makoki, na mwa bampóso oyo ekolanda, ya kotika mosala yango, mpo moto mosusu aponama na esika oyo ya bango.

¹¹ Kasi nde, na ebandeli ya mayangani ya kolamuka oyo (soki Nzambe alingi) nalingi kosala awa na tabernacle oyo, ntango kaka nakosilisa kozwa mwa bopémi, na bongo nde

na—nde na... tokobulisa basungi yango na kotiéláká bango maboko, basungi ná mobómbi-misolo ya losambo oyo. Kasi basengeli liboso koponama mpe—mpe kotala lolenge basepeli na yango mpe lolenge eyanganelo esepéli na yango. Na nsima soki ezali—na nsima soki bamoko ná bamosusu basepeli na yango, bongo nde tokobulisa mibali yango lokola basungi, kaka ndenge toponaka Bayángeli-misolo mpe lokola.

¹² Ezali bokonzi ya nsómi mpe mobeko ya lingomba, na nzela na Liloba na Nzambe. Na yango, bakoki bobele koloba te ete: “Namoni ete mobali oyo nde alóngobani mpenza,” ezali bongo te, “Ndeko Neville amoni ete mobali oyo nde alóngobani mpenza,” to “likita ya bayangeli misolo bamoni ete mobali oyo nde alóngobani mpenza.” Esengeli nde kozala lingomba! Awa, moto moko te asálaka makambo na ndenge na ye moko. Ezalaka nde kopona ya lingomba. Lingomba nde ezali na bokonzi nyonso.

¹³ Mokanda oyo ya kala ya masengesi ebébisamaki na mpela ya mobu 1937. Tozóngelaki kokoma yango, mpe tokobamba yango na etutu awa kala mingi te, misala ya bayángeli-misolo, basungi, babómbi-misolo, mpe bongo na bongo, mokengeli, balandi-mokengeli, mpe bongo na bongo.

¹⁴ Na ngolu na Nzambe, ndenge bayebisaki ngai, mpe na koponama mokama likolo na mokama ya likita mobimba ya losambo oyo, bamoni ete Ndeko Hollin Hickerson azali moto ya bosembo, ya lokumu, mpe alóngobani mpo na kotiamana na esika oyo mpo na kozua lo—lokumu monene ya kozala mosungi na tabernacle oyo.

¹⁵ Lisusu, tomoni, mpe na koponama ya likita, ete Ndeko Collins mpe, emonani ete azali moto na lokumu mpe ya sembo. Lokola azali motei, ye moko, na bongo tokosénga na ye ete áya mpo na kozala mo—mosungi na losambo; kaka mosungi te, kasi molandi ya Ndeko Neville, ntango mosusu mpo na kelasi ya eteyelo ya lomingo, to mpo na kozua esika ya Ndeko Neville, to eloko nyonso oyo tokoki kobenga ye na yango mpo na kozala molandi ya Ndeko Neville. Ezali Ndeko Collins.

¹⁶ Mpe, lisusu, lingomba emoni mpe esepeli na Ndeko Tony Zabel, moto na lokumu mpe ya sembo, mpe likita ya bayángeli-misolo ná bakengeli basepeli na ye, mpe esengi na ye ete ándima mosala ya mosungi na tabernacle oyo.

¹⁷ Mpe esengamaki lisusu, mpe tomonaki moto mosusu ya lokumu katikati na biso... (Ezali te ete... bango kaka nde bato na lokumu te, sikawa, kasi likita nde esili kopona bango.) Ndeko Taylor ya Henryville, to ya Memphis, nabanzi, Memphis, na Indiana. Azalaka elongo na biso eleki mwa ntango, asálaka mosala ya huissier mpe nyonso oyo ekoki kosalema. Na bongo losambo esepeli na ye, to likita ná bakengeli, ete ándima mo—mosala monene ya kozala mosungi ya tabernacle oyo.

18 Esengami mpe na bokilo ya Ndeko Mike Egan, Ndeko—Ndeko Bob Harned, oyo asíli koponama na likita mpe na bakengeli, mpo na kondima mosala ya mobómbi-misolo ya tabernacle oyo, yango ezali mosala ya lokumu, mpe eséngaka boyengebene ná lokumu.

19 Na kosaláká likambo oyo, nakanisi, bandeko na ngai, ete kobengama na bino awa, ezali lokumu monene mpo na bino. Mpe bobele wana te, kasi mpe mokumba ya kosala eloko moko.

20 Na ngonga oyo nakosenga na Ndeko Neville, mokengeli molandi na biso, ete átánga makambo oyo eséngami na mosungi. Ndeko Neville, okoki kotánga yango uta na Liloba na Nzambe. [Ndeko Neville atánga Timote ya Liboso 3:8-13—Mok.]

[Ekoki mpe na basungi ete bázala bato na sémbó na bozito, na minoko mibale te, baoyo bakomelaka vinyo mingi te, baluli na mosolo te;]

[Básimba libombami ya kondima na lisósoli ya peto.]

[Bango bámekama liboso; soko bakomónana na ekweli te, ete bázala basungi.]

[Basi mpe bázala na sémbó na bozito, bato na kotúkatuka te, bato na kokanga motema mpe na sémbó na makambo nyonso.]

[Tika ete basungi bázala babáli na mwasi moko mpe babátela mpenza malamú bana na bango ná ndako na bango.]

[Mpo ete baoyo bakosalaka mosala lokola basungi bakozua lokumu malamú bango mpenza, mpe mpiko mingi kati na kondima oyo ezali kati na Klisto Yesu.]

21 Amen. Nalingi sikawa kosenga na bandeko oyo bayoki bankombo na bango, soki bakolinga kopusana liboso awa na etumbelo mwa ngonga moke. Mpe wana togumbi mitó mwa moke mpo na libondeli, nalingi ete bango... Mpe losambo bayebi likambo oyo, ete oyo ezali kopona likita ya basungi na bino mpe mobómbi misolo na bino.

22 Nkolo Yesu, ezali na makanisi ya sémbó mpe ya búle nde toyei epai na Yo sikawa. Toyei na limemia ya Liloba na Yo oyo Eleki Búle, toyei na kondimáká ete “Liloba ya moto nyonso ézala lokuta, kasi oyo ya Nzambe ézala solo.” Mpe tozóngisi matondi epai na Yo mpo na Lingomba oyo Yesu asómbaki na Makila na Ye Moko ya motuya, mpe asíli kopésa biso ndako-a-nzambe oyo mpo tósambelaka kati na yango.

23 Mpe lokola babáteli ya etóngá monene oyo ya bampate, oyo Molimo Mosanto asili kobongísa ete biso tózala yango, tozali sikawa komeka kotalisa na eyanganelo oyo, etonga ya bato ya sembo, ya bayengebene oyo biso tondimi ete batóndisami na Molimo mpe babélemi mpo na mosala. Ndenge elobamáká mbala moko mpo na likita ya basungi ete: “Bókende kopona katikati

na bino, mibali oyo bazali na litatoli ya malamumu mpe bazali na Molimo Mosanto, mpo bákoka kosala mosala ya boye, kotala makambo ya basi bakúfélé mibali ná bana bitiké, kokabola misolo, mpe kobatela malamumu biloko ya losambo.” Mibu ebele na nsima, touti kotánga makomi ya moto monene oyo azuáki mpemela, santu Polo, oyo alobaki makambo oyo Makomi elobi na ntina na makambo maséngami ya bisika ya boye.

²⁴ E Nzambe, pésa bato oyo lokumu. Sikawa na oyo etali kopona, Nkolo, lokola losambo oyo ezali na bokonzi ya bonsómi, lokola nzoto ya Nkolo Yesu, nde bango bakopona. Mpe... [Maloba mazangi na eteni oyo ya bande—Mok.]... mpe kokamba eteni oyo ya liyangani na lolenge ya libanda na momesano, na Nkombo wana ya sembo mpe ya bulee ya Yesu.

²⁵ Sikawa wana togumbi mitó, bobele mitó te kasi mitema mpe, mpe wana bandimi nyonso ya losambo oyo, oyo ayaka awa mbala na mbala mpe asungaka yango na moko na zomi ná makabo na bango, oyo atángamaka lokola mondimi ya losambo oyo, wana mokengeli ná ngai, biso moko, tozali kotala, mokengeli molandi, Ndeko Neville, ná ngai tozali kotala, nalingi kotuna soki losambo oyo emoni ete Ndeko Taylor azali moto ya sembo mpe akoki koponama, na makanisi na bino ya malamumu koleka, mpo na kokóma mosungi na lisanga ya bato oyo? Bokotalisa yango na kotómbóláká loboko. [Ndeko Branham atiki koloba—Mok.] Malamumu. Sikawa soki moto moko asepele te, okolinga kotombola loboko. [Ndeko Branham atiki koloba.] Matondi.

²⁶ Ezali na moto moko ya losambo awa oyo amoni ete... mpe bino nyonso, bomoni ete Ndeko Hollin Hickerson azali moto ya sembo mpe ya lokumu, mpe moto oyo bomoni, na miso na bino, ete alóngobani mpo na kokóma mosungi ya losambo oyo? Okolinga kotalisa yango na kotómbóláká loboko ya mobali. [Ndeko Branham atiki koloba—Mok.] Soki ezali bongo te, na bongo tómbola loboko. [Ndeko Branham atiki koloba.]

²⁷ Eyanganelo oyo emoni mpe bongo, ete Ndeko Collins azali moto ya sembo mpe ya lokumu, mpe alóngobani na mosala ya kozala mosungi ya losambo oyo? Okoki kotómbóla loboko. [Ndeko Branham atiki koloba—Mok.] Malamumu. Soki osepele te, tómbóla loboko. [Ndeko Branham atiki koloba.]

²⁸ Losambo oyo emoni ete Ndeko Tony Zabel azali moto na lokumu mpe alóngobani mpo na mosala oyo, ya kozala mosungi ya etonga ya bampate oyo, na losambo oyo? Okoki kotómbóla loboko ya mobali. [Ndeko Branham atiki koloba—Mok.] Soki osepele te, tómbóla loboko. [Ndeko Branham atiki koloba.]

²⁹ Eyanganelo oyo emoni ete Ndeko Harned azali moto sembo mpe boyengebene, oyo azalaka elongo na biso esali mwa ntango, mpo akóma mobombi-misolo, secrétaire-mobombi misolo ya losambo oyo, mpo átálaka makambo ya mbongo mpe áfutaka ba-facture na yango? Soki ezali bongo, tómbóla loboko ya mobali.

[Ndeko Branham atiki koloba—Mok.] Soki moto moko aboi, átombola loboko ya mobali. [Ndeko Branham atiki koloba.]

³⁰ Nalingi koloba na ba—bandeko oyo batelemi sikawa, na nsé ya ekulusu oyo, ete losambo oyo, mokama likoló na mokama (na bokeseni ata moko te), bamoni ete bolóngobani na miso na Nzambe mpo na mosala oyo Nzambe abengi bino na yango.

³¹ Sikawa, bino, ndenge elobaki: “Bámeka bango liboso, mpo na komona soki basepeli na mosala yango.” O ntei ya mwa ba—mpóso ekoya, soki Nzambe alingi, nakozonga awa mpo na kotielá mibali oyo maboko, mpo bákoma na miso ya bato nyonso bayang-...to basungi ya losambo oyo, mpe lokola mobombi misolo.

Tógumba mitó mwa moke:

³² Nkolo, tozali na esengo na mpokwa oyo mpo ezali naino na bato oyo bazali kobika na mokili, baoyo bakoki kotámbola na bosantu liboso na mokili; na bosantu mpenza na lolenge ete tabernacle ya makambo makasi lokola oyo, ekoki kopona mpe kotia na mosala bato mitano, lokola bakambi na bango, zángá moto moko áboya. Tozali na esengo mpo na bango, mpe tomoni ete Ozalaki elongo na biso mpo na kozua mikano yango, likita ná biso bakengeli.

³³ E Nzambe, pámbola bato oyo. Mpe tika ete básala mosala yango na motema mobimba, koyeba ete ezali kopesa bango esika ya lokumu mingi na Likoló. Mokolo moko, ntango ba—Búku ya Likoló ekokangama, tika ete Buku ya bizali ya likoló mpe Buku monene ya Likoló éfungwama, tika ete bankombo na bango ézala mokama likolo na mokama liboso na Nzambe mpe Mobikisi mpe liboso na mampinga nyonso ya Likoló, ézala ndenge moko na Bokonzi na Ye. Pámbole bango, Nkolo, mpe tika ete básála mosala yango malamú. Na Nkombo na Yesu nde totondi Yo mpo na bango. Amen.

³⁴ Nalingi bobele kopesa bino mbote ya loboko, Ndeko Harned, Ndeko Zabel, Ndeko Collins, Ndeko Hickerson, ná Ndeko Taylor. Nazali mpenza na esengo ya koyeba ete tozalaka na bondeko ntango nyonso oyo ná bato ya lokumu ya boye. Nzambe ápambola bino sikawa. Mpe tokomónana ná bino kala mingi mpenza te, kaka ntango nakosilisa kopéma mwa moke, nakozonga awa mpo tótala soki bosepéli na mosala yango. Malamú, kokokana na kopona yango, nakanisi ezalaki mokama likolo na mokama, ata moto moko te aboi.

³⁵ Oh, bozali na esengo te ndenge bozali elongo ná bato, lelo, oyo bazali kobika bomoi ya bulee liboso na Nzambe, mpe kobika liboso na mokili oyo na lolenge wana? Ezali likambo moko ya malamú mingi.

³⁶ Mpe nazali na esengo mingi ya koyeba na mpokwa oyo ete nazali na litomba ya—ya kozala na bato oyo ná losambo oyo lokola baninga na ngai. Nazali na esengo mingi ndenge Nzambe

apésá ngai moko nzela ya kosangana ná Lingomba na Ye na mokili mobimba. Oh, bazali baoyo batiólami, babóyami mpe balobaka mabe na ntina na bango, mpe ndenge nalobaki na ntongo, na liteya na ngai, ntango mosusu bazali kaka bapoti-potopóto, ndenge mokili emónaka bango, lokola “etonga ya bilandálanda,” kasi Nzambe atálaka bango lokola bana na Ye. Nazali na esengo mpo na yango. Bakoki kozánga makoki ya koyebisa bino ba-kilometre boni ekabolaka biso na sánzá. Bakoki kozánga makoki ya koyebisa bino nyonso etali systeme solaire mpe lolenge yango etámbolaka. Kasi ezali na likambo moko oyo bayebi malamau, bayebi ngonga oyo babótamaki mbala ya mibale. Nazali na esengo mingi mpo na bango.

³⁷ Ezali lokola lisese moko oyo nayokaki, mpe na mpokwa oyo nakokótisa bana na ngai mibale ya basi na kati na yango mpo ézala polele mpo na biso, mpo ékóma likambo ya sólosolo mpo na biso, mpo bósosola ndimbola na yango. Na ntongo moko, nautaki kolamuka mpe kotika mbeto. . . Nazali na bana ya basi mibale ya mike. Moko nkombo na ye Rebeka, mosusu Sara, mpe bazali bana basi mike ya papa.

³⁸ Nazali mpe na mwana mobali moko ya moke, Joseph. Nazalaki koya, kouta na Chattanooga, na liyangani moko na mpokwa moko, ntango nazalaki kuna, na mayangani oyo euti koleka. Nazalaki na kati ya—na motuka, nazalaki elongo ná mwana na ngai ya liboso ya mobali, Billy. Mwasi na ye ná Meda bazalaki na kati ya motuka, ná bana basi yango. Wana tozalaki kotambola, moto moko te alobaki likambo nsima na ba-balabala mwa mingi. Mpe nautaki kobéta bato makasi na mpokwa yango, na ntina na ndenge bazalaki kotambola. Moto moko te alobaki likambo. Mpe Joseph moke ayaki wana mpe akangáki ngai na lipeka, alobaki: “Papa, otéyaki mpenza na mpokwa oyo!”

³⁹ Mpe na ntongo ya lelo, ntango nazalaki kolongwa mpo na kokende na Balabala ya Mwambe mpe ya Zomi, mo. . .to na balabala Penn ná oyo ya Zomi, kútu, moto moko te alobaki likambo, mwasi na ngai ná bana basi mibale. Mpe Joseph moke akangaki ngai lisusu na lipeka, alobaki: “Papa, nasepelaki mpenza na liteya ya ntongo ya lelo,” alobaki bongo.

Nalobaki: “Ee, nazali na moto moko oyo akumisaka ngai, ezali mwana na ngai ya mobali.”


⁴⁰ Tózonga na mwa lisolo oyo nazalaki kobeta. Nautaki kolamuka na ntongo moko, nafandaki na chambre, Becky moke ayaki mbangu mpe, tóloba, afándaki na lokolo na ngai mpe atiaki loboko zinga-zinga na ngai, mpe ye azalaka mwana mwasi moke ya papa. Mpe azalaki koyamba-yamba ngai. Sara moke mpe alongwaki na mbeto, alataki mwa pyjama na ye, tóloba, ye mpe ayaki mbangu. Ye azali leki, miso na ye ezali mwa moindo.

⁴¹ Becky moke alobaki: “Oh, Sara, ozali na ntina ya koya te, mpo nasili kozua Papa mobimba ngai moko. Papa mobimba azali

ya ngai!” Mpe Sara moke, mwa bibebu na ye ekitaki, mwa miso na ye ya mwa moindo ezipamaki. Nabengaki ye *boye* kozanga koloba mpe nabimisaki libolongu mosusu, ye mpe ayaki mpe afandelaki yango.

⁴² Becky azalaka na makolo ya milai, boye yango ezalaki kokóma na nse. Sara moke azalaki kotenga-tenga, na bongo nasimbaki Sara na maboko na ngai mibale. Sara moke atálaki Becky mpe alobaki: “Becky, okoki kozua Papa mobimba, kasi Papa azui ngai mobimba!”

⁴³ Nakanisi ete ezali mpe bongo awa. Tokoki kozánga koyeba likindo mobimba ná maloba minene nyonso ya lokóta ya Greki, etonga ya bato oyo bakoki kozanga koyeba yango. Kasi likambo moko ezali mpenza ya solo, nandimi ete Yesu asili kozua *biso* nyonso. Amen.

Malamu, Ndeko Neville. 

58-0720E Kotiama Ya Basungi
Branham Tabernacle
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org